

आकाशवाणी जयपुर-अजमेर
प्रादेशिक समाचार

- केन्द्रीय मंत्रिमंडल एक लाख करोड़ रुपया की रोजगार प्रोत्साहन योजना ने मंजूरी दी—**नुवी राष्ट्रीय खेल नीति** ने मंजूरी
- देशभर की अदालतों में चाल रहा मुकदमों की तादाद में कमी लावण सारू आज 90 दिन की अभियान सुरू करी ज्यों
- राज्य सरकार हाईकोर्ट में **एस.आई. भर्ती परीक्षा-2021** रद्द की करण ऊं जुड़यो हलफनामो पेश कीनों

अर

- प्रदेश की ऊगणी जिला की कई हलका में बिरखा में बधोतरी-धौलपुर जिला की बाड़ी में 14 सेंटीमीटर पाणी बरस्सों

000

केन्द्रीय मंत्रिमंडल नौकरी धंधा में बधावो देवण ऊं जुड़ी करीब एक लाख करोड़ रुपया की **रोजगार-संबंधी प्रोत्साहन योजना** ने मंजूरी दे दीनी हैं इण की मकसद आवता दो साल में देश में साढ़े तीन करोड़ ऊं बत्ती नौकरियां पैदा करण में बधावो देवणो हैं आ में एक करोड़ 92 लाख जणा पहली दफा नौकरी हासिल करण वाळा व्हेलां आ योजना एक अगस्त 2025 ऊं 31 जुलाई 2027 बीच लागण वाळी नौकरियां माथे लागू व्हेलां केन्द्रीय मंत्री अश्विनी वैष्णव आज नई दिल्ली में व्ही मंत्रिमंडल की मीटिंग में लिया ज्या फैसला की बारा में खबरनवीसां ने जाणकारी दीनी वे बतायो के ई योजना की तैत पहली दफा नौकरी लागण वाळा कर्मचारियों ने एक महीना की तनखाह 15 हजार रुपया ताई मिलेलां ई रे जरिये विनिर्माण हलका माथे खास ध्यान दियो जावेलां

.....

कैबिनेट एक लाख करोड़ रुपया की खजाना सागे अनुसंधान विकास अर नवाचार योजना ने ई मंजूरी दे दीनीं ई योजना की मकसद देश में रिसर्च अर डवलपमेंट की ईको सिस्टम में मजबूत बणावणो हैं मंत्रिमंडल **राष्ट्रीय खेल नीति 2025** ने ई मंजूरी दे दीनी हैं श्री वैष्णव बतायो के नुवी खेल नीति ऊं खेलां ऊं जुड़्या बुनियादी ढांचा में और बेहतर बणायो जावेलां ई सागे ई प्रतिभाओं की पिछाण कर र वों ने सिखावण देवण माथे जोर दियो जावेलां इण ऊं अंतर्राष्ट्रीय आयोजनां सारू भारत की मजबूत दावेदारी ई पेश करी जा सकेलां

000

रेल मंत्री अश्विनी वैष्णव आज नई दिल्ली में रेल यात्री सेवा की **वन-स्टॉप समाधान** सारू रेलवे ऐप की सुरूआत कीनीं ई मौके श्री वैष्णव कहयो के ई ऐप रे जरिये जनरल डिब्बा में सफर की टिकट ई लिया जा सके हैं ओ ऐप रेलों ऊं जुड़ी पृच्छाछ, पीएनआर, यात्रा योजना, रेल मदद सेवा अर भोजन की सुबीता एक ई ठोड़ मुहैया करावे हैं रेलमंत्री रेलवे की अहलकरी ने मुसाफिरों की हिफाजत माथे खास ध्यान देवण बाबत कह्यों

000

देश की अदालतों में चाल रहा मुकदमा की तादाद कम करण सारू आज अभियान सुरू करी ज्यों 90 दिन की ई अभियान की तैत राजीनामा ऊं खत्म कर्या जावण वाळा मुकदमों की पिछाण करी जावेलां राज्य विधिक सेवा प्राधिकरण की सदस्य सचिव हरिओम शर्मा बतायो के ई पाछे पिछाण करी ज्या मामलों की राजीनामा ऊं निपटारो कर्यो जावेलां

000

राजस्थान पुलिस एस.आई. भर्ती परीक्षा 2021 रद्द की जावेलां राज्य सरकार हाईकोर्ट में कैबिनेट सब कमेटी की रपट पेश करता थकां आ जाणकारी दीनीं महाधिवक्ता राजेन्द्र प्रसाद राजस्थान हाईकोर्ट में कैबिनेट सब कमेटी की रपट ने हलफनामा सागे पेश कीनीं वे बतायो के कमेटी ई मामला की जांच पाछे भर्ती रद्द की करण की सिफारिश कीनी हैं मुख्यमंत्री की दफतर की ओर ऊं ई इण की मंजूरी दे दीरीजी हैं ई मामला में आखिरी सुणवाई 7 जुलाई ने व्हेलां

000

शिक्षा अर पंचायती राज मंत्री मदन दिलावर आज नई दिल्ली में केन्द्रीय कृषि मंत्री शिवराज सिंह चौहान सागे मुलाकात कर र गौपालक लगा र गायां ने चरावण सारू ले जावण की जूनी रीत ओजू सुरू करण की मांग कीनीं वे कहयो के हर साल करीब पांच हजार लोग खुला में चरबा वाळा गौवंश रे कारण हादसां की फेट में आ र मर जावे हैं, जद के 20 हजार ऊं बत्ता लोग जख्मी व्हे जावे हैं वे कहयो के खुला में घूमती गायां पॉलीथीन खा र मर जावे हैं श्री दिलावर केन्द्रीय मंत्री ऊं राज्य सरकार कानी ऊं चलाया जावण वाळा पॉलीथीन की थैलियां भेळी करण की अभियान ने मनरेगा में जोड़बा की मंजूरी देवण की मांग ई कीनीं

000

केन्द्रीय कानून मंत्री अर्जुनराम मेघवाल आज श्रीगंगानगर जिला की अनूपगढ़ में पीएमश्री राजकीय बालिका विद्यालय में विकास की पूरा व्हा काम जनता ने सूर्यां ई मौके वे कहयो के नुवी शिक्षा नीति रे मार्फत ईसान की पूरा विकास माथे जोर दियो ज्यों हैं

.....

000

चिकित्सा मंत्री गजेन्द्र सिंह खींवर आज जयपुर ऊं राज्य स्तर की स्टॉप डायरिया अभियान की सुरूआत कीनीं ई मौके वे कहयो के पांच साल उम्र ऊं छोटा बच्चों में दस्त अर वों रे कारण व्हेवण वाळी परेशानियां कई दफा जानलेवा बण जावे हैं

वे बतायो के 15 अगस्त ताई चालण वाळा ई अभियान रे दौरान “**डायरिया की रोकथाम, सफाई और ओआरएस से रखें अपना ध्यान**” मुद्दा माथे न्यारा-न्यारा महकमां रा तालमेल ऊं भांत-भांत रा काम कर्या जावेलां अभियान रा तैत आशा सहयोगिनियां री मदद ऊं घर-घर जा र बच्चां ने ओआरएस रा पुड़का अर जिक री गोळियां दी जावेलां

000

आकाशवाणी री महानिदेशक डॉ. प्रज्ञा पालीवाल गौड़ जिम्मेदार प्रसारण सागे कार्यक्रमों ने रुचिकर बणावण माथे जोर दीनो हैं वे आकाशवाणी रा कार्यक्रम प्रमुखां ऊं नुवा-नुवा काम करण अर हर पीढ़ी रा लोगां ने जोड़बा री बात कहीं डॉ. पालीवाल आज जयपुर मांय प्रदेश रा आकाशवाणी केंद्रां रा कार्यक्रम प्रमुखां री दो दिन री राज्य स्तर री समीक्षा बैठक रा समापन सत्र मांय बोल रही हैं

वे कह्यो के आकाशवाणी सूचना, शिक्षा अर मनोरंजन रा मकसद सागे ऊं काम कर रह्यो हैं महानिदेशक अहलकारां ऊं फील्ड मांय जा र सजीव कार्यक्रम तैयार करण अर नुवी प्रतिभावां ने बत्ता ऊं बत्ता मोका देवण बाबत् ई कह्यो

000

राज्य रा ऊगणी हलका मांय केई ठोड़ां आज बिरखा मांय बधोतरी व्ही हैं बारां, बूंदी, भीलवाड़ा अर आरे-सारे रा जिलां मांय एक-दो ठोड़ां घणी भारी बिरखा व्हेवण अर जयपुर, भरतपुर अर बीकानेर मांय कठे-कठे हल्की ऊं मझला दर्जा री बरसात रा आसार हैं ई बीचे आज ई प्रदेश मांय न्यारी-न्यारी ठोड़ां बिरखा व्हीं राजधानी जयपुर अर हनुमानगढ़ मांय रिमझिम बिरखा व्हीं श्रीगंगानगर जिला मांय केई ठोड़ां हल्की ऊं मझला दर्जा री बरसात व्हीं म्हाणा खबरनवीस बतायो के गजसिंहपुर, मुकलावा अर ठेठार समेत केई ठोड़ां चोखो मेह बरस्यो मौसम विभाग रे मुजब लारला चौबीस घंटां मांय सब ऊं बत्ती साढे 14 सेंटीमीटर बारिश धौलपुर जिला रा बाड़ी मांय व्हीं

000

परदेश मांय काम करण वाळां कानी ऊं देश मांय भेजी ज्या धन मांय माली साल 2024-25 रे दौरान 14 फीसदी री बधोतरी व्हीं भारतीय रिजर्व बैंक कानी ऊं ई बारा मांय जारी करी ज्या आंकड़ां रे मुजब परदेश मांय काम करण वाळा भारत रा लोग साल 2024 मांय रिकॉर्ड एक सौ 29 दशमलव चार अरब डॉलर री रकम देश मांय भेजी भारत परदेशां ऊं साल 2024 मांय कामगारां कानी ऊं भेजी जावण वाळी रकम रा मामला मांय अव्वल है, जद के 68 अरब डॉलर सागे मेक्सिको दूजी माथे है जदके विश्व बैंक रा अर्थशास्त्रियां रे मुजब चीन 48 अरब डॉलर सागे तीजी ठोड माथे हैं भारत ऊं परदेश मांय जा र काम करण वाळां री तादाद साल 2024 मांय एक करोड़ 85 लाख व्हे गयी, जदके साल 1990 मांय आ तादाद 66 लाख हैं

000